

二曲集

射

傳沉
如章

二曲集卷十七

書

鄂縣門人王心敬撫次

報鄂制臺

僕本庸謬無似，明公不察，誤採虛聲，聘主關中書院講席。三辭不獲，冒昧從事。過承躬迎，屢辱左顧。僕非木石，寧不知感，所以不敢一詣憲轅。謁謝者，實以生平安邱壑之分，未嘗投足公門。今若一旦破例，有負特達之深知，翻辱闡幽之盛舉，則其爲罪大矣。肅此鳴謝，伏惟鑒原。

報阿撫臺

報三司道府兩縣同

屢辱枉顧，惶愧殊甚。僕庶人也，庶人無入公門之禮，倘不以禮自處，明公亦何取於僕耶？是以逡巡不敢報謁，賢如執事，必蒙鑒原。

答阿撫臺

承餽金數鎰，惠恤良至。僕璧謝再四，非敢矯情，實以辭受一節，乃人生操履所關。若隨

來隨受則生平掃地矣。且明公加意於僕者，以僕能安貧也。安貧而受金，則僕之安貧何在？以故不避方命之嫌，仍用返璧，萬惟垂察是幸。

上鄂制臺

明公以國家太平之業，必先於正人心，故思得碩儒以振起斯民，而又急無其人，不得不禮從隗始。誠吾道之中興，而生民之大幸也。顧僕實非其人，適以重爲斯文之辱。前者三辭不獲，覲顏應召，兩赴書院，言無可聽，行無可取。中夜自思，既負明公下問之誠，兼愧朋友琢磨之益，方欲束身告退，肆力耕耘，忽聞愚賤之名上塵睿覽，驚魂欲墜，俯仰難安。自拜辭抵家，卽染寒疾，歷久不痊，遂至右足不仁，艱於步履。夫薦賢者，國家之大典，豈容以廢疾之人濫膺宸命哉？況今接對賓客，皆倚杖而行，猶或顛躓，其必不能舞蹈丹墀也，不待問而可知矣。伏乞明公格外施仁，代爲題覆，使病廢之人得以終安。畎則始之終之，其恩皆出於明公矣。若以前疏旣上，後難復請，是甚不然。歷觀前代盛時，凡徵辟不就者，皆傳爲美談，而誦薦舉者之知人，其有出就一職，名實俱喪者，往往取笑於當時，貽譏於後世。此前事之已驗，然則明公今日寧傳爲美談乎？抑

爲人譏笑乎二者當知所擇矣

又

前書已揭愚衷而憲臺未察又蒙鈞諭下頒僕撫心自思實非敢以退讓爲高而拂憲臺爲國家起賢之至意也夫事當權其輕重而慮其始終僕今日者廢疾家居負朝廷旁求之意其罪猶小異日者名喪實忘使天下咎憲臺無知人之明且爲國典之辱其罪甚大不自知恥應召而行始之也甚易以身事主無忝所學終之也甚難故僕寧擇其輕而不敢爲其易也在憲臺之意以爲僕雖不能有益於國家亦不至有負於大典而以僕計之則甚不然竊觀古人學真行實尙受謗於當時往往困辱其身况僕草野愚蒙本無學術即使之應對殿廷亦且言無倫次羣起而非之殆不可以屈指計矣僕固不足惜獨是憲臺明無不照而爲僕一人所累致有不知人之譏則雖擢僕之髮又烏足以贖其罪哉此僕之所以擇其輕而辭其重圖其始而卽慮其終非特爲僕一身之計實所以爲憲臺計爲國家計者至悉而無以加也如猶不獲所請卽當以死繼之斷不敢惜此餘生以爲大典之辱也存沒之誠言盡於此

辭徵

顓少失學問、無他技能、徒抱臯魚之至痛、敢希和靖之高踪、不虞聲聞過情、上徹宸聰、部檄地方起送、蓋曠典也、顓何人斯、敢辱斯典、若謬不自揆、冒昧奔趨、是借終南作捷徑、可鄙孰甚、有士如此、朝廷亦安用之、况顓近因汗後中溼、宿疾頓發、左足麻木、不能步履、豈堪遠涉長途、趨走拜舞、對揚丹陛也、伏望矜鑒、特爲轉達、曲成石隱、使顓不至狼狽道途、自速其斃、佩德頌仁、於無窮矣、

又

竊惟朝廷之所以崇幽隱嘉恬退者、原藉以砥囂俗息奔競也、假令顓康健無恙、猶當仰體朝廷美意、益堅素守、終其身萬萬不敢出戶一步、以成朝廷激勵廉恥、保全石隱之盛德、矧顓中年蚤衰、宿病時發、輕則連旬、重則彌月、近又左足不仁、不能動履、若使狼狽長途、性命必且難保、辱盛典而貽口實、非所以昭示天下後世也、歷觀前代隱逸、凡屢徵不起、咸賴當事爲之善言題覆、今大憲情慨倜儻、樂成人美、殘疾如顓、必在所矜憫、伏望始終玉成、曲垂保全、錄顓前後辭牘、據以達部、免致薦頒敦促之命、

益重至再違戾之罪。顒刻骨銘心，終身不敢忘施也。

又

顒前曾兩次陳情，意謂業已達部矣，乃猶未蒙矜鑒，督促愈嚴，惶悚踴躍，莫知所措。顒外雖有虛名，內原無實學，千破萬綻，素鮮寸善，是以審己量力，死不敢謬膺盛典，以傷朝廷知人之明。重以迍邐多病，呻吟牀褥，夢幻泡影之身，諒亦非久。緣是百念俱灰，毫無身外之想。又安能以奄奄待盡之息，出逐風塵之苦，自速其斃耶？伏望特垂洪造，曲賜保全，備錄顒前後辭牘，據以達部。庶部中知地方督促之殷，區區辭謝之堅，得以據情具題，誤恩不至再降顒也不材，敢忘保全之仁。

又

顒於客歲九月中，因中溼成足疾，不能動履，已具情上控，乃自今歲正二月閒，緣去冬所服攻伐之劑過多，冬蘊春發，又增痰火，周身疼痛，徹夜難眠，雖視息無恙，而元氣索然。醫經屢易藥罔奏功，遂成沈痼，傷心自憐。醫鄰俱在，豈容假託，懇乞執事俯憐病軀，據實轉申，則顒有生之年，皆戴德之日也。

又

顓本庸謬無似。蒙 朝廷過信誤薦。垂眷至再。心非木石。寧不悚感。卽欲匍匐詣京。一覲 天顏。顧病勢日甚。一日。萬難勉強。始則惟患足疾。近又增以痰火。徧身疼痛。度刻如年。耳聾目眩。時常昏暈。疲癯支離之狀。難以盡述。療治百方。卒未見效。因思顓之先人祖父伯叔。咸以是疾畢命。顓亦何能得久。自去冬臥牀。纏綿至今。不扶不動。儼如眠尸。若力疾就程。勞頓致殞。委骸骨於旅次。貽天下以口實。曰 朝廷以隱逸待李顓。而李顓爲隱不終。扶病趨榮。自速其斃。失 朝廷獎恬退息奔競之初意。顓死有餘辜矣。爲此瀝血哀鳴。伏願具情申憲。轉籲 皇仁。憐顓篤廢。容顓養病。以昭 朝廷保全石隱之盛德。未必非大典之一光也。伏枕口占以請。無任激切懇禱之至。

又

顓一介草莽。叨沐溫綸。使非廢篤。敢不力趨。召命不幸。素染風痺。不時舉發。今歲增劇。竟致兩足不仁。始則跬步難移。繼而伏牀不起。醫藥罔效。一息僅存。昨已陳情本縣。詳達仁天。隨蒙憲駁。顓憂惕愈增。卽使身膏道途。不幾有負盛典。懇祈垂恩。廣仁人之

施俯准轉達，俾顛踉伏田里，長爲堯舜之民，倘餘息獲延，世世徼二天之造矣。

康熙癸丑督撫以地方隱逸薦此其辭牘也

康熙戊午部中以海內真儒薦先生長臥不起長君伯敏爲之上下力控詳具別冊

答四川周總督

承迂途相訪，折節榻前，位高而心下，非慕道誠切，何以至是。昔王文成官刑曹時，迎蔡羣首於署，以禮請問。蔡曰：「尙未頃之。」至後亭再拜請問。蔡曰：「尙未。」問至再三，蔡曰：「汝後亭禮雖隆，終不忘官相。今公之於僕，可謂忘官相矣。僕感公摯誼，業已饒舌。」茲接來翰，勤勤懇懇，復以入門下手爲問。夫入門下手，無他祕密，可拈惟在從自己心上隱微處查考。安身立命處著急，日用立身行己處痛自檢束。目前戎務殷繁，莫非鍊心之藉。象山掌庫三年，學問大進。王文成謂除了人情事變，別無工夫可做。湛甘泉論爲學喫緊之要，只在隨處體認天理。若必待戎務有暇，而後整肅身心，料理工夫，則是閒時操存，忙時放過，心隨法華轉，非是轉法華。夫豈造次必於是之謂耶？故必不論有事無事，閒時忙時，隨在提撕，終日乾乾，無事恆若有事，有事行所無事，立身行已在此，安身立命

在此鄙言已盡於此再晤之諭不敢聞命僕杜門謝客宴息靜攝願公見愛以德相亮以情答其已同哀閔去矣無忝吾事則曲成之雅銘佩不忘此復

又

阿太守書來述公口諭謂自撫山左時卽聞名渴慕及督兩廣日與廣中二三賢紳共佩教言寤寐思服昨獲登龍深慰十年立雪之願請益方始乃咫尺不獲再侍函丈豈誠有所未孚而根器駑下不堪鞭策乎僕讀之不覺顏忸怩而心悚懼幾無以自容夫真正闇修之人洗心藏密雖鬼神不能覲其微況人乎僕之浮名遠播正是洗心不密人得而窺轉相告語譽過其實其名彌張其罪愈大識者方當憐憫何可誤信虛聲以傷知人之明鄙說流於廣中不知出自何人迂腐之談不足當明眼人一噓而公嗜之若飴嚮僕甚篤自非根器過人天性樂善安能如是僕所以啓戶一晤知己而不敢覲顏再晤者實以閉戶之人數啓戶以接顯貴閉戶之謂何公愛我者也愛我則必思所以成我豈可令僕閉戶不終壞例以開紛紛之端耶况僕言苟可採採其言如晤其人不會覲面討論若言無可採則雖日相晤對奚益也直布腹心千萬原諒

答建威將軍

屢承誤愛感荷無涯茲又蒙垂注惠貽種種自揣病廢如僕何以得此於麾下哉在將軍行之固爲盛德在僕受之則爲非義僕生平百不逮人惟於辭受之節頗知自慎若并此一失將軍亦何取於僕耶今後乞全愚守惠無再貽則僕也拜賜多矣肅此報謝臨風如見

答許學憲

世道隆污由正人盛衰而正人盛衰由學術明晦故學術明則正人盛正人盛則世道隆此明學術所以爲匡時救世第一務也顧明學術不在標宗立旨別樹門戶只在就士所習表章四書今夫四書之在天下家傳戶誦童而習之白首不廢解者積案充棟本自章明何待表章噫正惟家傳戶誦人人共習而所習之得失實世道生民治亂安危善惡生死之關有心世道者誠就其所習而挽其失救其積習起其痼疾令其反諸身見諸行是乃所謂表章也

又

反身拙錄乃僕師弟子一時商證之談不謂使君遽以災木僕方私竊跼蹐忽接來諭云云愈令人駭愕此書止期私下同病相憐對證投劑以反身二字與同人相切磋若一經進呈適滋多事不觸嫌招忌則搜山薰穴僕將不知其所終矣不知使君將何以爲我謀耶幸寢斯念曲垂保全俾僕永堅末路庶不貽羞知己此復

又

督學學術之宗人才風教所從出也以正學爲督則人以正學爲尙學正則心正心正則立身行己無往非正正人多而後世道生民有所賴薛陳耿周諸公之提督學校也先本後末咸以倡明正學爲第一義當是時士謹繩墨人崇禮教各往往格物以窮理居敬以反身二者並修日充月著雖中庸之流亦奉訓承式不敢悖風聲所鼓即閭巷父兄長老亦知誦說古誼以自淑故風習最淳言純師行純法之儒後先輩出或出或處咸有補於世嗚呼盛哉其諸公風厲之實謹揭其略於左

薛文清公督學山東教人一以朱子白鹿洞規爲式所至誘掖獎勸備極勤劬爲一時督學使者之冠陳恭愍公督學河南念學者不修實行而競爲浮詞取科第力欲變

其故習訓生徒一主於躬行所巡歷不居公府宿於學宮端默危坐以率之已而徐行諦視周旋磬折絃管豆登洋洋翼翼比入夜齋館燈燭如白晝討論之聲錚然公時以二燈前導省勸之人人競奮其教人必本於朱文公小學以達於四書五經性理通鑑諸生翕然孚化畏信如神明既去思之如父母相與誦義不休

耿天臺公督學南直毅然以斯文爲己任隨機立教多方開發由其內者公爲之推離還源相與踊躍如寐得覺由其外者公爲之易辟就裏相與浣濯如疾獲痊摩蕩鼓舞天機自暢是時部內樵者朱光信陶人韓樂吾及田夫夏雲峯稱知學公皆極力敦禮表章爲多士風

周海門公督學廣東嘗謂學之不講聖人爲憂此非特爲經生學子言實經世宰物者之所不能外也學無地而可離則講無時而可輟天下無人不可以學則亦無人不可以講況正在所統之諸生乎於是巡歷所至諄懇敷宣移檄郡邑到處提撕當支離困敝之餘直指本心以示之學者霍然如枯得脫客得歸始信人性之皆善而箇箇心中原自有仲尼士習爲之一變

許敬庵公督學陝西、巡歷所至、首勗生儒以學、集眾講貫、每至夜分、幕賓或規其過勞、且曰、校文足矣、何以講爲、公笑曰、如此則是督文、非督學也、講勸愈力、見人之善、多方接引、闡幽隱、表節義、美政犁然、校士畢、旋省、則闢正學書院、拔郡邑諸生之俊乂者於中、朝夕提誨、自勞來至於振德、有等有序、仍申儀節、嚴盟約、頒行各庠、俾各立會、會講他若習公元山之督貴陽、魏公莊渠之督嶺南、蕭公鳴鳳之督京畿、宋公儀望之督八閩、亦皆敦本尙實、勤於訓迪、迨昌啓以還、柄其任者、無復此風、以致士自詞章聲利之外、不復知學問爲何事、日趨日下、而孔孟身心性命之學、掃地矣、振鐸音於絕響、曉長夜而覺之、端有望於今日也、伏願使君凡至會所下學之日、勿拘掣簽講書故事、一以理學爲多士倡、諸生中有器宇不凡、識度明爽、議論精簡、發揮入理者、假以顏色、優以禮貌、仍令教官及地方各舉所知、明註某生理學有名、某生材堪經濟、詳列所長、眾論僉同、俟試士畢、問以學術、策以時務、觀其所答優劣、拔錄而面察之、如果表裏允符、卓然不羣、則格外優異、獎一勵百、風聲所屆、自然士知嚮往

表章先哲、所以風厲後進、蘭州先哲段容思先生、諱堅、以理學開先秦、周小泉

先生諱蕙，奮迹成卒。鳳翔先哲在成宏開，則有張默齋先生；諱傑，昌啓開，則有張鷄山先生。諱舜典，並倡學明道，爲世真儒。流風餘韻於今爲烈，其祠宇不知尙存與否。伏願移檄查訪，存則令地方以時修葺，無則禮以義起，不妨勉其設處，勸舉如力有未逮，不能三楹，卽一楹亦可以棲神，稍存眉目，以成地方勝跡。興賢崇德，古今令典。旌貞表操，學政首務。其有造詣不凡，道德著聞，或孝弟孚於鄉邦，節操人所共欽者，察訪的確，大則式廬，小則行獎。

鞏昌府秦安縣有已故高士蔡啓胤者，人稱爲溪巖先生。隱居不仕，閉戶闇修。孝友之行，淵源之學，西方人士仰爲楷模。十餘年前，以事親成勞先親而卒。臨卒，扶掖再拜辭親，依依不舍，囑家人斂以麻冠，斬衰以己，不獲送終故也。卒之日，遠邇悼歎，如喪私親。其德化入人之深如此。胞弟啓賢亦言動不苟，品望素隆。胤子生員蕃，忠信朴茂，力田敦倫，可謂滿門孝弟一家三代。下邑有士如此，可以風矣。宜思所以表之，以上皆學政所關，正人心，昭風猷，於是乎在他學憲不皆如是，而使君獨如是，雖欲不謂之空谷足音，不可也。然歟否歟，統惟憲裁。

又

接翰示知慨納鄙言。臯蘭天水諸儒先咸經表章。此百年以來學政之僅見也。執事於是乎加人一等矣。承詢關中理學書可以進呈者。將以進呈。味眾人之所弗味。闡眾人之所弗闡。使理學一脈不至落寞。大君子之作爲。超於尋常萬萬矣。橫渠書無未刻祕本。其板行之書。西銘正蒙。列於性理。他若理窟易說文集之精確者。散見性理。已經前代表章。無容再贅。橫渠之後。諸儒著述。惟呂涇野。馮少墟。足以繼響。雖未洞本徹源。上達性天。而下學繩墨。確有發揮。呂之遺書。如四書因問。史約文集。未免散漫。惟語錄。議論篤樸。切於日用。馮之全集。與薛文清讀書錄相表裏。馮與東林顧涇陽高景逸同時。鼎足倡道。領袖斯文。顧高學固醇正。然其遺集中閒散作。猶未脫文字氣習。兼多閒議論。閒應酬。往往越俎而談。旁及世故。識者不無遺憾。馮則詞無枝葉。語不旁涉。精確痛快。豁人心目。如欲進呈。無過是書及涇野語錄。抑區區尤有商焉。呂馮二集。理學之書也。理學經濟。原相表裏。進呈理學書。而不進呈經濟之書。則有體無用。是有裏而無表。非所以明體適用。內聖而外王也。經濟書。大學衍義而外。莫切於呂氏實政錄。言言痛

切字字喫緊讀之令人躍然擊節其書固板行有年然真知而實好之者寥寥無聞亦猶孟子漢唐以來雖已行世不過私相傳習至宋程朱始極力表章明興載入令甲朝野始翕然崇尚今誠乘詔求遺書特疏上聞請照康熙十二年頒賜大學衍義於各省大臣例以實政錄通飭天下督撫藩臬道府州縣各衙門俾各倣此修職業勤政務以圖實效處處有快心之美政則處處蒙至治之厚澤三五熙皞不難再見於今日矣然是錄止可以飭外吏而非所以端治本絳州辛復元所著衡門芹一書卷首治本三綱實探本至論致治良畫宜并進呈鄙見如斯統惟酌奪

又

關學不振久矣目前人物介潔自律則朝邑有人孝廉全操則渭南有人風雅獨步氣誼過人則富平有人工於臨池詞翰清暢則華陰有人其次詩學專門則郿塢郃陽上郡北地天水臯蘭亦各有人若夫留意理學稍知斂華就實志存經濟務爲有用之學者猶龜毛兔角不但目未之見耳亦絕不之聞提倡振興是在執事聞試竣旋省將集俊又於關中書院立會論學如果見之施行須以明體適用爲導俾士知務實學期有

用異日德成材達不忘淵源所自

又

承侍御許酉山先生以所著見貽開緘捧讀見其根極理要不覺斂衽既而又得先生答無錫秦赤仙書益悉先生之學以顧諟天之明命爲宗旨以告天盡倫爲日課有頭腦有夾持與世之學昧本原而功鮮實際者不可同日而語三復之餘私竊景仰第土室中人素不通京國之書賢如先生亦必貫我土室中人希使君附便叱致是荷

又

關中之學橫渠先生開先郿縣橫渠鎮乃其故里也先生生於斯長於斯老於斯葬於斯則橫渠之爲橫渠亦猶曲阜之闕里英靈精爽必洋洋於斯宋明以來建有橫渠書院春秋俎豆以酬功德萬歷天啓閒當事之政崇風教者嘗加葺修今年久傾圯僕竊歎息按二程朱子書院之在洛陽建陽者地方以時葺修此院之廢獨無人過而問焉好尙不同故也幸遇執事加意關學敢以爲請伏願量捐冰俸亟圖修復明振風猷默維道脈所關豈淺渺哉